

Jambatan Labuan lengkapkan Projek Pan Borneo

KWP hantar kertas kerja ke kabinet



ANNUAR menyampaikan ucapan watikah di Majlis Sesi Town Hall bersama warga Perbadanan Labuan pada Jumaat lalu.



**KORESPONDEN
KHAIRUL IDIN**

KEMENTERIAN Wilayah Persekutuan dalam usaha menyiapkan kertas kerja mengenai cadangan pembinaan Jambatan Labuan dan dikemukakan kepada kabinet bagi Kelulusan Permohonan Cadangan (RFP) dalam masa dua minggu lagi.

Menterinya, **Tan Sri TPr Annuar Musa** berkata, pembinaan jambatan tersebut amat penting bagi merencanakan pembangunan Labuan pada masa hadapan sebagai sebuah perniagaan dan kewangan antara-

bangsa Malaysia.
"Kami sedang menilai kepentingan jambatan itu yang menjadi pembangunan ekonomi Labuan dan kita juga perlu meneliti kawasan yang terjejas untuk kerja penambakan supaya pembangunan infrastruktur yang lebih mampan dapat dilaksanakan," katanya dalam sidang akhbar, di Labuan baru-baru ini.

Mengulas lanjut, beliau berkata pembinaan jambatan tersebut dapat dicapai dengan segera dan ia akan dibawa untuk taklimat kepada Jemaah Kabinet.

"Memandangkan jambatan akan melalui proses tender terbuka, kami akan lebih berhati-hati dalam pemilihan pemaju dan kita harap pelaksanaannya dapat dipercepatkan.

Terdahulu, cadangan pembinaan jambatan sepanjang 13 kilometer itu bakal menghubungkan Labuan dengan tanah besar Sabah.

Annuar berkata, sebaiknya cadangan pembinaan jambatan itu dapat menghubungkannya dengan Projek Pan Borneo yang menghubungkan Sabah dan Sarawak.

"Pegawai Kementerian telah mengadakan perbincangan awal dengan kerajaan Sabah yang telah menyokong pembinaan projek jambatan yang dicadangkan itu.

"Sekiranya Lebuhraya Pan Borneo dapat dihubungkan ke jambatan Labuan, ia akan memberi kesan sampingan terhadap sosioekonomi Labuan," katanya. **WJK**